

衢州文獻集成

〔集部〕

第
170
冊

衢州文獻集成

黃靈庚 諸葛慧艷

主編

〔集部〕

第
170
冊

國家圖書館出版社

第一七〇冊目錄

北山小集四十卷(卷三十九至四十)

(宋)程俱撰
傅增湘影宋寫本

樵隱詞一卷

(宋)毛开撰
明末毛氏汲古閣刻本

吾竹小稿一卷

(宋)毛珣撰
清抄《江湖群賢小集》本

實齋詠梅集一卷

(宋)張道洽撰
清乾隆六年(1741)曹氏二六書堂刻本

秋堂集三卷

(宋)柴望撰
民國三年(1914)李氏宜秋館刻本

柴氏四隱集五卷補遺一卷附錄一卷

(宋)柴望等撰
清嘉慶三年(1798)鮑氏知不足齋抄本

四隱集四卷

(宋)柴望等撰
清道光刻本

九三

一三五

一七一

一九五

二八一

三九七

北山小集卷第三十九

信安程

狀劄五

辭免召試中書舍人狀

右某准尚書省劄子云云聞命震惶不知所措伏念臣

才術不競性質蠢愚加以積憂薰必志思凋耗問學


寢廢文字荒疎使勉就於試言必難充於盛選所有

召試恩命伏望聖慈特賜寢罷庶安愚分不致疾顛

無任

云云

辭免除中書舍人狀



右臣今月十一日准尚書省劄子奉 聖旨召試中書
舍人尋具奏辭免乞賜寢罷上件恩命十三日准尚
書省劄子奉 聖旨程俱特免試除中書舍人日下供
職者臣仰戴誤恩益不遑處敢布誠悃上瀆睿聰竊
以西掖詞臣當世高選自非文學足以資潤色而備
顧問才識足以明治道而達國體公望所屬豈敢冒
居而臣迂褊之質既無取材鄙陋之文又不足道年
齡迫於耆艾心志耗於隱憂苟貪寵榮不量稱否必
速官謗上負簡求而况班著之中俊彥甚衆以之充
選諒不乏才猥以命臣實深惶懼伏望 聖慈察其懇

款收還新命曲賜允俞螻蛄之私不勝幸願臣無任

舉自代狀

二十四日授告二十五日告謝賜章服
二十七日正謝

右臣伏覩朝請大夫行尚書駕部員外郎王禹得學
問淹通資性簡靜揚歷中外幾二十年老於郎曹泊
無墮獲如蒙進擢以鎮躁浮舉以代臣實允公議

繳詞頭狀

今月二十七日准中書門下省刑房送到詞頭一道內
朝請郎耿延禧復龍圖閣學士令臣命行者右臣竊
以謂刑賞進退皆當覽天下之公議而行之則勸沮
明而天下服夫致天下之亂者蔡京王黼童貫及京

之子收致京城之陷者耿南仲及其子延禧者此天下之公議也當靖康時南仲以官僚之舊雖避宰相之位而實當宰相之權愛子延禧乃一時之宗王陷京城者非此而誰臣以謂南仲延禧之罪不在於議和而在於沮天下之兵蓋兵威振而後和可成也以古今之迹考之則可知已其所謂沮天下已到之兵者前日臣寮言之備矣今二聖之北狩未還宗社之艱危未濟上下岌岌宵旰靡寧南仲延禧不得不任其責而乃起自廢放盡復舊職無乃廢天下之公議乎所有延禧復龍圖閣學士詞頭臣未敢命行

繳李處勦再任詞頭奏狀

今月二十六日准中書門下省吏房送到錄黃一道
為知衢州李處勦今任滿令再任事令臣書行者右
臣竊以方今國勢未安莫如固邦本而勞米撫綏使
百姓稍安廬里不轉而為餓殍盜賊者守令之職也
李處勦久在衢州科率無度軍期之入收支不明妄
召使臣虛破請受具弊不一科率之令名色實繁朝
行夕改如以絹折米後復折錢應就縣納者忽令赴
州應納本色者又行折變人不堪命殆不聊生契勘
州郡用度縱令不足不免科敷亦當至誠惻怛思戢

姦弊使出入分明民無橫費則亦無復怨嗟處勸漫不加察而州縣之吏與攬納人首尾相應務為侵擾山鄉百姓擔擎送納動是數程非理退抑率意改更令窮朴之民奔走轉換倍費不暇自然厭苦唯命是從須於攬納人處倍價收買見抄方免追驅催迫料數略無休息處勸之政若此豈陛下固邦本安百姓之意哉又處勸既逼替期已謀寄居外縣於是益務苟媮委政佐幕勢湏姑息豪猾假借吏人若令再任必有寄名買產屈法故縱收恩鬻獄之事亦非所以全處勸也況為後來之代者又是其叔傳正雖強

有占市人誰敢言方陛下厲精求治之秋必不以一
州苟便震勸而使疲瘵之民重不幸也所有處勸再
任錄黃臣未敢書行貼黃契勘處勸見帶權發遣其
進奏院却供合稱知衢州軍州事致錄黃誤作知衢
州伏乞照會施行

繳宋暎詞頭奏狀

准中書門下省刑房送到宋暎復舊官官觀差遣調
頭令臣命詞行下者右臣謹按宋暎天資儉壬唯利
是嗜出守州郡以至備官寺監見內外貴倖利權所
在者無不以諂交貨取得其利而後已至艱難之初

亟除待制出使六路忠勞茂聞罪戾昭著昨言者論之詳矣夫赦令之有叙復者常法也具予奪則當揆之以天下之至理士夫之公議而行之今喚自散官用赦復舊官其為湛恩亦已足矣乃并以宮觀差遣與之則它日復有赦恩將寢復待制之職矣如待制者非宋暎等輩之所得為者乃可以赦宥馴致而牽復之乎如此則凡能趨利奪便由徑媚竈以取美官高位者皆為得計而視英才恬默沉逸之士為無能矣然則奔競安得息而風俗安得厚乎此臣之所以不得不先事而論者也伏望聖慈特降指揮其宋暎

依赦復官外宮觀差遣乞賜寢罷

轉對狀

右臣准御史臺牒十月一日輪當轉對者臣伏讀改元德音宗祀赦令陛下所以勤恤人隱惻怛丁寧之意可謂備矣豈非以謂人心者邦本之所以固耶自天下兵動以來其橫潰四方為生靈之禍國家之憂者衆矣然有叛卒而無叛民今者江西福建湖廣之民徃徃起而為盜此不可不思其故也傳曰應天以實不以文動民以行不以言今仁愛之言聞於天下屢矣元元之民必將冀其實也且朝廷知民之所患

莫大於科率之繁重故令提刑司覺察州縣科率者
以自盜賊論夫科率之繁重由府庫空竭橫費日加也
不取之民將安出哉如此則雖以自盜定罪日殺一
人而不能禁其科率之為害又如姦賊不才之吏
之為害深也所謂科率之錢官用一二私取八九者
是已監司不按與之同罪所以禁切之亦至矣然賊
吏終不止者何也由不御擇守令監司而未嘗正賊
吏之罪故也遠州僻縣未嘗聞使者之足音使傳忽
至非搜府庫竭膏血輟耕穫之夫以挽負於道塗耗
糧儲以悅隨行之吏卒則親舊賓客請託為姦如是

而已民之疾苦不問也賊吏不按也豈唯不按又罔
朝廷而薦之州有軍期之庫縣積軍期之錢如德音
所云者皆是也然且迭為姦欺不相蒙則相持耳夫
監司郡守不御擇賊吏不正典刑無額之斂無所稽
考告賞之科不嚴則雖日下一詔而姦賊之吏不悛
也如此則德音之欲去賊吏之弊者尚為有實乎夫
科數之害未能遽去也剝民之財破民之產常使其
入皆以資公上緩急之須則元元之民尚無憾也而
所謂官用一二私用八九者存焉此民之所以怨也
縣令不能徧知也則亦御擇郡守監司而已朝廷誠

恤窮民疾賊吏何不遣一忠信才能之使取一二州科
數侵盜之尤廉核而考驗之若其匿文書庇胥吏俾
使者不得治者則其姦狀明矣罷之而對置又重告
賞之格以發其姦而賊吏得矣賊吏得付之定法而
必行之如祖宗之時或可以少警矣如此而後橫斂
之患稍息藉令不得已而斂之悉以資公上之急而
不以肥賊吏之家矣庶幾民少安而無怨則聖主所
以發德音而下明詔者非空言也惟陛下留神裁斷
以安窮困之民則天下幸甚

辭免權侍講狀

右臣今月八日准尚書省劄子三省同奉聖旨差臣
兼權侍講者臣一介愚賤上蒙恩簡雖是暫權然臣
伏自惟念學術淺陋心力衰疲今此盡瘁絲綸尚恐
速荒踈誤忘之早若侍經帷幄必將有鄙拙尸素之
譏聞命之初惶恐無喻伏望聖慈特降睿旨別選時
俊罷臣上件權侍講指揮俾安愚分不勝幸甚謹錄

奏聞伏候勅旨

十月十日奉
聖旨不允

十月十三日上殿

臣竊以謂制誥者人主所以號令天下而鼓動群物
之具也其可不御其言哉臣觀前古訓誥之文具都

俞戒飭吁咈之詞未嘗過其實也唯其稱而已矣昔
者有臣如皋陶者而舜稱其功止曰汝作士明于五
刑以弼五教期于予治四方風動惟乃之休而已有
臣如周公者而成王稱之止曰惟公德明光于上下
勤施于四方而已其稱畢公曰惟公懋德克勤小物
弼亮四世正色率下罔不祇師言而已其餘則皆相
與儆戒訓飭之言也後世儼辭案句稱頌功德如啓
事之為者恐非臣下所當得於君上者也至如西漢
去古未遠故當時詔令號為溫厚其詞皆節緩而思
深於進退黜陟之間不為溢言以沒其實夫號令之